


范文正文集

九碑


墓誌




漢書門	10202	類
函	七	架
冊	一	冊

內閣文庫	漢書	類
冊	一	冊
函	一	架

內閣文庫	番號	漢	10202
	冊數		10(9)
	函號		313 303






宋文正范先生文集卷之九

淺草文庫

宋范仲淹希文 著

明康丕揚士遇 校



唐狄梁公碑

天地閉孰將闢焉日月蝕孰將廓焉大厦仆孰將起焉神器墜孰將舉焉巖巖平克當其任者惟梁公之偉歟公諱仁傑字懷英太原人也祖宗高烈本傳在矣公為子極于孝為臣極于忠忠孝之外

揭如日月者敢歌于廟中公嘗赴并州掾過太行
山反瞻河陽見白雲孤飛曰吾親在其下久而不
能去左右為之感動詩有陟岵陟屺傷君子于役
弗忘其親之深于嗟乎孝之至也忠之所繇生平
公嘗以同府掾當使絕域其母老疾公謂之曰柰
何重太夫人萬里之憂請長史府請代行時長史
司馬方毗睚不協感公之義歡如平生于嗟乎與
人交而先其憂况君臣之際乎公為大理寺丞決
諸道滯獄萬七千人天下服其平武衛將軍權善

才坐伐昭陵栢高宗命戮之公抗奏不却上怒曰
彼致我不孝左右築公令出公前曰陛下以一樹
而殺一將軍張釋之所謂假有盜長陵一抔土則
將何法以加之臣豈敢奉詔陷陛下於不道帝意
解善才得恕死于嗟乎執法之官患在少恩公獨
愛君以仁何所存之遠乎高宗幸汾陽宮道出妬
女祠下彼俗謂盛服過者必有風雷之災并州發
數萬人別開御道公為填使曰天子之行風伯知
清塵雨師灑道彼何害哉遽命罷其役又公為江

南巡檢使奏毀淫祠千七百所所存惟夏禹太伯
季子伍員四廟曰安使無功血食以亂明哲之祠
乎于嗟乎神猶正之而况於人乎公為寧州刺史
能撫戎夏郡人紀之碑及遷豫州會越王亂後緣
坐七百人籍沒者五千口有使促行刑公緩之密
表以聞曰臣言似理逆人不言則辜陛下好生之
意表成復毀意不能定彼咸非本心唯陛下矜焉
勅貸之流于九原郡道出寧州舊治父老迎而勞
之曰我狄史君治汝輩邪相攜哭于碑下齋三日

而去于嗟乎古謂民之父母如公則邇焉斯人也
死而生之豈父母之能乎時宰相張光輔率師平
越王之亂將士貪暴公拒之不應光輔怒曰州將
忽元師邪對曰公以三十萬衆除一亂臣彼脇從
輩聞王師來乘城而降者萬計公縱暴兵殺降以
為功使無辜之肝腦塗地如得尚方斬馬劍加人
於君頭雖死無恨光輔不能屈奏公不遜左遷復
州刺史于嗟乎孟軻有言威武不能挫是為大文
夫其公之謂乎為地官侍郎同鳳閣鸞臺平臺事

為來俊臣誣御下獄公曰大周革命萬物惟新唐
朝舊臣甘從誅戮因家人告變得免死貶彭澤令
獄吏嘗抑公誣引揚執乘公曰天平吾何能為以
首觸柱流血被面彼懼而謝焉于嗟乎陷穿之中
不義不為况廟堂之上乎契丹陷冀州起公為魏
州刺史以禦焉時河朔震動咸驅民保鄆郭公至
下令曰百姓復爾業寇來吾自當之狄聞風而退
魏人為之立碑未幾人相請罷皮疏勒等四鎮以
肥中國又請罷安東以息江南之饋輸識者韙之

北狄再寇趙定間出公為河北道元帥狄退就命
公為安撫大使前為突厥所脇從者咸逃散山谷
公請曲赦河北諸州以安反側朝廷從之于嗟乎
四方之事知無不為豈虛尚清談而已乎公在相
日中宗幽房陵則天欲立武三思為儲嗣一日問
群臣可否眾皆稱賀公退而不荅則天曰無廼有
異識乎對曰有之昨陛下命三思募武士歲時之
間才數百人及命廬陵王代之數日之間應者十
倍臣知人心未厭唐德則天怒令策出又一日則

天謂公曰我夢雙陸不勝者何對曰雙陸不勝宮
中無子也復命策出又一日則天有疾公入問閣
中則天曰我夢鸚鵡雙翅折者何對曰武者陛下
之姓相王廬陵王則陛下之羽翼也是可折乎時
三思在側怒發赤色則天以公屢言不奪一旦感
悟遣中使密召廬陵王矯衣而人人無知者乃召
公坐于簾外而問曰我欲立三思群臣無不可者
惟俟公一言從之則與卿長保富貴不從則無復
得與卿相見矣公從容對曰太子天下之本本一

搖而天下動陛下以一心之欲輕天下之動哉太
宗百戰取天下授之子孫三思何與焉背高宗寢
疾令陛下權親軍國陛下奄有神器數十年又將
以三思為後如天下何且姑與毋孰親子與姪孰
近立廬陵王則陛下萬歲後享唐之血食立三思
則宗廟無祔始之禮臣不敢愛死以奉制陛下其
圖焉則天感泣命褰簾使廬陵王拜公曰今日國
老與汝天子公哭于地則天命左右起之拊公背
曰豈朕之臣社稷之臣耶已而奏曰還宮無儀孰

為太子復置廬陵王於龍門備禮以迎中外大悅
于嗟乎定天下之業斷天下之疑其至誠如神雷
震之威不得而變乎則天嘗命公擇人公曰欲何
為曰可將相者公曰如求文章則今宰相李嶠蘇
味道足矣豈文士齷齪思得奇才以成天下之務
乎荆州長史張柬之真宰相才誠老矣一朝用之
尚能竭其心乃召拜洛州司馬他日又問人於公
對曰臣前言張柬之雖遷洛州猶未用焉改秋官
侍郎及召為相果能誅張易之輩返正中宗復則

天為皇太后于嗟乎薄文華重才實其知人之深
乎公之勲德不可殫言有論議數十萬言李邕載
之別傳論者謂松栢不火金石不棄受於天焉公
為大理丞抗天子而不屈在豫州日拒元帥而不
下及居相位而能復廢主以正天下之本豈非剛
正之氣出乎誠性見于事彙當時優游薦紳之中
顛而不扶危而不持者亦何以哉某貶守鄱陽移
丹徒郡道過彭澤謁公之祠而述焉又系之云商
有三仁弗救其滅漢有四皓正於未奪嗚呼武暴

如火李寒如灰何心不隨何力可回我公哀傷極
天之亡逆長風而孤騫想大川以獨航金可輩公
不可單孰為乎剛地可動公不可動孰為乎方一
朝感通群陰披攘天子既臣而皇天下既周而唐
七世發靈萬年垂光噫非天下之至誠其孰能當

宋故軹州刺史張公神道碑

舜天下知其德也惟歷試諸難禹天下知其功也
惟盡力溝洫聖人率天下以勤故能成其務逮夫
王道缺滂坐飾詒言六代之風亡實而落君子弗

觀也我朝用舜禹之道平成萬邦風化天下於諸
使莫敢不勞而有清河張公之最焉天貽厥心則
明則粹拳拳四方老於王監為舜禹之臣至矣公
諱綸字昌言其先因職命氏源流蓋遠孝友之基
自仲而大五世食韓並為正卿厥生帝師首造大
漢唐失公謹文以慟暨安史亂華衣冠裘緒降皇
及五代不可以祿幽芳密照需于遠郊今為汝陰
人也皇孝諱震王考諱元皆含仁竦義朕于一鄉
考諱煦累贈尚書都官郎中太夫人翟氏累封高

平縣太君都官端脩有大識謂時否之傾家可起也與夫人諄諄蚤暮篤子以文公刺景鍛志鏗然有就旣而慷慨與人語方畧郡國異之以造秀再送于春官所尚弗合退居于易時太祖旣定大業太宗乃輯群瑞經營天下使旌交路復署士三班以走命于四方公曰抱關蹶張肯賢或為之部以名聞有充其選自茲周旋至于光大其進秩也四命至東頭供奉官閤門祗候歷崇班承制于內殿改禮賓六宅副使遷文思使昭州刺史荐拜西上

東上閤門使除虢州刺史其更任也淳化中主權酌于大名之屬邑及王鈞亂蜀方行天討公使于軍中賊平監慶州兵馬西戎方豪我摧其鋒逸益簡路都巡檢使真宗皇帝思清天下之刑命按荆湖諸州獄還乃刺舉畿赤制權右振綱目也俄以邊略典辰溪郡又平涼鎮戎三城西陲之機鍵公整專之南夷再亂持節安撫辰昂澧三州溪洞事定朝廷以東南諸路監鐵饋運之重命使孔艱及公而諸六年有大績遷領天水郡實提重兵以壓

庶羗蓋西諸侯之長焉及朝廷有均勞之議徙橫
海軍又徙瀛州高陽關兵馬鈐轄重北門也歲餘
請老不獲命復蒞清池郡已而露章至于再三今
上念功不廢詔以本郡寵之爵命如故時景祐紀
號之二載也明年孟春庚寅啟手足于正寢享年
七十有五上聞而悼之舉延世之典命二子進級
即以仲月庚申葬于汝陰縣之懷音鄉從先域也
公初娶富春孫氏再娶彭城劉氏生子曰孝竭與
夫人皆亡今夫人江夏黃氏出大夫之宗能循法

度封本邑君生子曰孝標孝孫皆早世曰紹宗今
為侍禁曰紹先為殿直並幼公位登二千石權嘗
亞大摠管階至光祿爵為郡公考終于鄉邦國人
榮之君子謂不充其器初蜀師之役中軍雲侯有
終辟公以行如左右手平定坤維公有力焉時降
寇八百人叛據巖險中軍督公追斬戒無遺類公
往視之曰此窮寇也急之生患乃諭其向背寇莫
不誠聽束手歸公以見中軍而全活焉詩云正直
是與神之聽之而况於人乎公再至益簡屬寇戎

之後民求息肩新軍復驕且敢肆暴公曰兵猶火
也將不可嚮邇磔數輩麾下其衆乃戢蜀人賴之
詩云民亦勞止汙可小休式遏寇虐無俾民憂公
之典辰溪也彼夷人中彭姓一族稱其疆點溪洞
數州署兄弟以為守國家因其請焉後乃驕叛邊
鄙既襲域邑朝廷患之公至築蓬山館理新興柵
以要其夷道且省戍兵條舉十事不及四五而有
平涼之行夷又侵我帝復召公曰僉謂彼可戢焉
朕惟弗忍汝往圖之公再拜稽首曰惡草雖微天

地不能絕其類先王毆之無猾夏爾帝曰俞惟康
厥民居公馳傳以臨謂彼夷者不威不懲不見利
不勸廼以謀夫駭其族曰天家使且至方檄兵四
道焚若山林毀若巢穴弗滅弗已夷乃大懼請命
公曰納爾爵秩歸我老孺天子聖且仁吾為君請
夷如其教乃疾置以聞詔原之後其命數貢賜如
平日生齒之還者對以力布作石柱刺夷人之誓
揭于疆首自茲威懷迄今將二十年蔑復為患詩
云式固爾猷淮夷卒獲翩彼飛鷲集于泮林食我

桑黥懷我好音謂夷如惡禽亦感而化然公之使
東南也鹺利方剥議者咸峻文重禁以籠其民公
曰天與之我取之又可哉平奏通秦楚三州亭民
除其宿逋佑以熬波之具貨入于縣官而增與之
直民力遂振復創杭秀海三郡鹽亭自是鹽筭大
克于諸路信乎百姓足君孰與不足時江東大水
民胥艱食公請治五渠以洩于海議者謂澤國下
流江海與平彼潮者通夜不息沙從而塞欲導焉
而何極公曰不然江海善下故能為百谷王彼日

之潮有損與盈三分其時損居二焉衆川乘其損
而趨之曾莫禦哉彼沙者歲月而積闢以農隙豈
安于災而恡乎力僉從我謀而蘓秀蒙其利又淮
南漕河界湖之東偏歲時決溢汨我農畝涸我糧
道公請增長堤二百里旁錮巨石為十闌以疏其
橫流舍役伍于堤上不力一民而日廣月高復樹
以美木今山陽郡東歷高郵抵廣陵塗無畏日南
北人歌焉詩云蔽芾甘棠勿剪勿伐召伯所茇謂
思其人愛其樹也又海陵郡有古堰亘百有五十

里厥廢曠久秋濤為患公請修復議者難之謂將
有蓄潦之憂公曰濤之患歲十而九潦之災歲十
而一護九而亡一不亦可乎且請自為郡而圖焉
詔以本使兼領之堰成復逋戶二千有六百郡民
建生祠以報公于今祠之詩云樂只君子民之父
母樂只君子德音不已謂利及生民則樹無窮之
名焉公嘗使于夏臺時納款惟初見公之儀知朝
廷禮樂始盡其心焉復三使于北疆聽公之言知
天子神眈永懷其好焉詩云四國于蕃四方于宜

謂夷狄為患則往蕃屏之恩澤弗暨則往宣暢之
其公之謂乎逮于貳膳之年聖倚彌重歷雄武河
間橫海三大鎮時天下無事公謹其法制安以清
淨如叔子之在襄陽仁信著于疆外公長七尺氣
勇過人背在西北歷戰十二大考長甲操擐自若
諸將伏其疆力公性剛不遠仁故無暴明不深物
故無怨孝親之心皓育如孤時言必涕下感動左
右復常好施與宗族同其有亡中外孤藐一養于
家雖享祿不薄屢膺蕃庶之賞徹樂之日門中索

然舊淮汴間運卒凍殍歲常比比及公為使每冬
以俸帛市絮襦千數衣其不自存者且飼而休之
使得卒歲曰此有司之過那使僵仆道途以累上
仁其愛君勤人如此而深也今文武班有考績之
制率當自表公曰國家庶讓之風未衰則吾豈敢
終身不為言其階于通顯並天子疇其勲異不得
而謝焉公祇事三朝幾五十年無一銖之罰又景
德而降權寄不絕保任官材僅三百人一無累者
其明哲於人如此而博也公發身如班定遠事邊

如馬伏波修水利如邵南陽議食貨如耿大農有
一于茲名聳後世公實兼之宜其被金石而不朽
矣將終召掾曹沛國朱宋草理命於牀下且謂某
嘗從事于使部僅知所存在甲令五品而上立神
道碑如不得已宜為我請孝子致其詞某不敢讓
惟公雄謀偉行布于四方非耳目可涯又多陰德
於人無能名焉敢言其略以顯我國家君子之休
其銘曰

天生張侯維賴之濱星萃于上炳為哲人儀茲聖

辰維侯之德彙文剛武弗無矜寡弗有疆禦猶仲
山甫維侯之言廼宣聖謨于彼西北西北有孚邦
家之樞維侯之功克顯克大攘彼戎寇禦彼災害
吾民是賴我生既勤我年斯臻廼懷故園廼謀嘉
賓鼓缶而嬉以休厥身帝錫我侯歸牧于鄉錦裘
煌煌鸞衡銜銜故老飲歌吾閭之光我侯為何四
方是力誠加于物心竭于國始終一德侯斯往焉
帝用惻然遺烈在人史其舍旃垂千萬年

宋故衛尉少卿分司西京胡公神道銘

公諱令儀字某開封陳留人也曾祖瑜祖紹屬唐
季五代之否嘉遁不顯父弼累贈尚書刑部侍郎
妣某氏贈滎陽縣太君初侍郎覲皇家之興廼以
儒行教子曰可仕矣公夙夜簡編絕而復續雍熙
中以明經中第解褐涇州長原尉丁太夫人憂服
除補潁川郡法掾又居侍郎之喪皆哀毀過人鄉
閭志之既練朝廷以前公在潁川辨折寃獄嘗活
人於死特令陞見拜大理評事知泰州海陵縣時
江淮內屬未久吏姦民毘凌弱暴寡視宰政如兒

戲公至則先令後刑必行無回人皆凜然憚之始服事于官上盖有西門豹之風焉遷光祿丞充刑部詳覆官閱天下案牘駁議無隱一切以正真宗嗣位改大理丞會三門發運判官以不職聞朝廷銓其材以公代之秩滿守巴漢郡賜五品服天子升岱宗慶均內外遷太子贊善大夫歸朝進殿中丞願高密郡徙治定襄遷國子博士拜虞部員外郎典歷城郡郡數萬戶多用豪力二千石鮮不受侮公正色直心視之無難會河決白馬為朝廷憂

詔發數十州兵民塞之科賦暴急後期者官更有不測之咎諸道皆奔走民負敲朴公於部中擇其挾貴人勢力州縣不敢動者一二年薄責于庭衆皆大懼曰是豕不可緩况吾屬耶咸輦其薪晝夜以西北諸州率先以濟由是民不被楚吏不坐責其幹力如此徙隴城郡歷比駕二部外郎在郡未幾破姦發伏有神明之號朝廷諒其公命提點河北諸州刑獄事諸州望風以畏莫有寃者拜主客郎中充淮南轉運使賜服三品改陝西轉運使且

許入覲進金部郎中西陞宿兵食貨為大公視民
豐儉歛收以時邊廩始克焉除河北轉運使未踰
月朝廷以河東方窘財用改河東轉運使公請備
民飛輓以實邊郡人或媒孽以為非便朝廷惑其
說徙守回中郡既而代公者復行前議公得辯改
知鳳翔府且有錫勞部中每歲造舟六百艘供大
河饋運必借民操篙泐涓而下以達于河凡有覆
溺破產而償吏私諸豪專擾下戶公重為立法使
得均一于今民道之明道初旱蝗西飛關中被其

害獨不入岐下人咸異之寮屬請以上聞公曰昔
劉琨為郡而虎渡河及帝問之琨曰偶然爾此劉
公所不敢當於吾何有聞者謂公質厚有古人之
心焉遷司勳郎中丞召還臺公歎曰吾年七十有
吾精力猶彊恩獎未衰豈不自知其止耶遂告老
於朝有詔嘉之拜衛尉少卿分司西京公既退即
家于長安聚書數千卷教子孫樂林泉每誦白傳
歌詩以怡性情凡十二年而終實某年某月也享
年八十有七以某年某月歸葬于開封之某鄉某

里附先侍郎之塋公少尚嚴毅老益精明斥惡與
善始終一節古所謂老成人者歟夫人張氏封內
鄉縣君先公而亡有三子長曰遠大理寺丞次曰
規耀州三原主簿次曰拱辰成州團練推官女七
人長適進士蘇贄次早亡次適閣門祗候陳惟一
次適臨澧主簿劉淑次適太子中舍邢保雍次適
大理評事韓仁哲次適將作監主簿趙士安孫男
七人並登仕籍初天聖中余掌泰州西溪之鹽局
日秋潮之患浸淫于海陵興化二邑間五穀不能

生百姓餓而逋者三千餘戶舊有太防廢而不治
余乃白制置發運使張侯綸張侯表余知興化縣
以復厥防會雨雪大至潮洶洶驚人而兵夫散走
旋濇而死者百餘人道路飛語謂死者數千而防
不可復朝廷遣中使按視將有中罷之議遽命公
為淮南轉運使以究其可否公急馳而至觀厥民
相厥地歎曰昔余為海陵宰知茲邑之田特為膏
腴大耕秋獲笑歌滿野民多富實徃徃重門擊柝
擬於公府今葭葦蒼茫無復遺民良可哀耶乃抗

章請必行前議張侯亦請兼領海陵郡朝廷從之
仍與張侯共董其役始成大防且一百五十里潮
不能害而二邑逋民悉復其業余始謀之以毋憂
去職二公實成之今二十餘載防果不壞非公之
同心豈及於民哉其子以余知公所存懇請為銘
而不讓辭曰

胡公之生皇朝之始觀文斯興執經以起自邇而
遐幹于王家法以持姦政以塞邪七守列藩四當
外計曰勤曰恭克威克惠告老于君以休吾身鼓

缶而歌十有二春子子孫孫詵詵濟濟九十其幾
手足云啟福歟壽歟有終有初豐碑巖巖我得而
書

宋故太子賓客分司西京謝公神道碑銘

皇家起五代之季破大昏削群雄廓視四表周被
萬國乃建禮立法與天下畫一而億兆之心帖然
承之弗暴弗悖無復鬪兵于中原者登九十載蓋
祖宗遠美善樹於前累聖求賢多得循良廉讓之
士布于中外而致茲善俗歟如陳留謝公可謂循

良廉讓之君子矣公諱濤字濟之幼而奇敏十四
歲講左氏春秋先生咸器之及冠居姑蘓郡時翰
林王公禹偁拾遺羅君處約並宰蘇之屬邑二人
相謂曰與濟之揚擢天人蓋吾曹敵也自茲名重
於時淳化三年春擢進士第除梓州權鹽院判官
會盜據成都發其徒攻郡縣公白二千石曰梓大
而近彼畏我梗必先圖得我則小於梓者可傳呼
而下願急為之防近郊多林木可先伐之以置櫓
櫓且備樵爨為久守之具二千石從之寇果圍我

我備既堅十旬弗破賊沮而留勢未大克以及王
師之來遂用撲滅事平就遷梓州觀察推官賜器
幣外臺遣權知益之華陽縣時寇亂之餘民多散
亡未復厥居上言者請募人占田可倍其租朝廷
從之於是有力者得并其田公曰奪民世產以資
富人復將召其怨辭豈朝廷之意耶乃盡取其田
以歸于民還拜著作佐郎太宗面詔通判大藩得
壽春郡後移高安郡改知興國軍就除太常博士
真宗即位銳意任人一日中出朝士姓名有治狀

者凡二十四人付中書門下令驛召至闕公在召
中得對于長春殿上說賜五品服即呼通事舍人
送試學士院明日邊有急奏上議北征又京東有
疆寇驚郡縣而曹南關守朝廷慮之遂命公往改
屯田員外郎至郡稱治寇不敢犯有兇人趙諫者
冒鄉薦名與諸弟出入都下交權勢結豪俠務棄
人之弊用以告訐或任威詐而大致富疆人畏如
豺虎公即圖之患僚佐不一其力俄會故御史中
丞李公及始來倅曹李公時之端人也與公協心

發其家盡得兇狀奏之朝廷命御史府業覆諫之
兄弟皆斬于都市乃下詔曰凡民非干已事無得
告言遂着于令自是天下訟息而刑清矣朝廷以
西蜀僅寧細民猶或搖之俾公安撫雨川用天子
恩意諭其父老皆從而按堵復命之日舉兩川能
吏三十餘人執政疑其多公請連坐事遂行後皆
至臺省又別詔委公與益牧張公詠議造大鐵錢
乃窮其利害使盜鑄息而物估平焉蜀人于今便
之歷三司度支判官出守海陵新安二郡就遷度

支司封員外郎公在三司日嘗舉權茶官至是坐
所舉不職免尋以度支員外郎起倅河南府馮魏
公薦公文行真宗簡在既久即命召試除兵部員
外郎直史館判三司理欠憑由司出為兩浙轉運
使公大雅之器耻尚文法雖任在按察而誠意坦
然且曰吾欲吏樂其職民安其俗爾士人黑白豈
不明乎安用伺於毫髮使惴惴如虺蜴然取詩人
之譏耶還臺進禮部郎中判司農寺拜以本官兼
侍御史知雜事淨靜端介百辟望其風采乾興初

進戶部郎中先帝大行有司治靈駕象物其制高
大請自京至陵凡郭門民舍有妨其往者毀之公
上言曰先帝封泰山祀汾睢儀衛至盛不聞有所
毀去今遺詔丁寧正如漢文帝專務儉薄豈以攸
司奪先帝意願陛下裁損縉紳驛之俄求東歸除
吏部郎中直昭文館知會稽郡還拜太常少卿判
登聞檢院又得請權西京留守司御史臺就拜秘
書監遂分務洛下朝廷嘉其恬退遷太子賓客嗣
子迎侍于京師以景祐元年十月三十日薨享年

七十有五以明年八月二十一日歸葬于富陽寶
元元年贈禮部尚書謝氏之先出黃帝後始為十
姓謝居一焉三代以還不顯其大至晉宋廼為盛
族公之七世祖汾居河南之緱氏五世祖希圖卒
于衢州刺史時唐季喪亂乃葬于江東嘉興郡子
殊三世祿于吳越曾祖諱廷徽處州麗水縣主簿
祖諱懿文杭州鹽官縣令葬于富陽遂為富陽人
父諱崇禮從錢氏歸朝為泰寧軍節度掌書記檢
校左散騎常侍累贈尚書戶部侍郎母崔氏贈博

陵縣太君公之弟四人曰炎有文於時與盧稹齊
名時人謂之盧謝國史有傳終于公安令鎬為某
官果從方外學號安隱師垣為某官公娶夫人許
氏先公而終生男三人長曰絳至兵部員外郎知
制誥後公幾年而亡次日約將作監主簿以敏才
稱次日綺太廟齋郎俱早世女四人長適前進士
周盤次適殿中丞梅堯臣次適太常博士傳瑩次
適大理寺丞楊士彥孫四人景初大理評事宰越
之餘姚縣景溫太常寺太祝宰越之會稽縣景平

將作監主簿景回尚幼公姿格竦異不事脩飾天
然有雅遠之範未嘗阿於貴勢見賤士必溫禮接
之知人之善稱道弗舍聞人之過懼弗克掩故終
身不聞怨言公始以文學中進士上第而長子長
孫世踐其科又父子更直館敍出處僅二十年皆
衣冠之盛事厥孫以公善狀請文于碑某於公有
家世之舊又與舍人為同年交愛公治有循良之
狀退得廉讓之體足以佑風化而厚禮俗致拳拳
以銘云

巍巍我宋宅天而君恢遠以威革暴以文濟濟吾
儒多良大夫中外共治休寧八區猗或謝公周旋
其中在梓禦寇至曹除兇天子念蜀猖狂始復命
公撫之鼓歌其俗偃仰藩屏雅和其政徊翔臺閣
清修其行人尚刻明我質而平厥民以寧人必夸
競我休而靜其道迺勝于嗟乎壽以仁至名繇德
全有子與孫相繼而賢誠乎誠乎聖人積善之誨
不吾欺焉

宋故同州觀察使李公神道碑銘

聖王之教萬民也資天地之生以為食籍山海之
出以為貨食均于上下貨通于遠邇則可以供郊
廟廩鄉士聚兵以征伐振民於災害然非得絕代
能臣持變通之數於天下則孰與成當世之務哉
故夷吾作輕重之權以霸齊桑羊行均輸之法以
助漢近則隋有高穎唐有劉晏皇朝有左丞陳公
恕是皆善天下之計者也爾後朝廷雖重此任而
常難其才天禧三年七月甲戌制曰樞密直學士
刑部侍郎士衡可三司使告謝之日天子面褒其

能屬以大計賜內帑錢二百萬緡以助經費復親
製寬財利論以賜之公當職五年間天子有事于
南郊又御端門既今上即位並大賚天下至于真
宗山陵再塞夫河之決其供億不可勝紀公皆優
游以辨需然有餘力蓋周知天下之利使流而不
竭中外服其通焉公字天均隴西成紀人也曾祖
渙贈尚書屯田郎中祖徹贈左諫議大夫父益贈
吏部尚書尚書娶惠氏贈扶風郡太君生子五人
公居其仲幼負氣節從鄉先生學即有聲于西州

太平興國八年春天子親策天下士第釋褐為京兆鄠縣主簿府知其才俾權領獄掾咸陽縣有民殺人具辭以送府父子五人皆伏加功之坐公告于尹曰掌試辨之蓋殺人者一餘四人掩其骸爾安可盡辟乎尹覆之卒從公議即謂公曰是四人者非子之明則寃于地下矣子有陰施後當貴乎移知眉州彭山縣就除大理評事以父憂去職服除由寇萊公薦領京兆渭橋輦運改司農丞除著作佐郎通判邠州真宗即位遷秘書丞知劍州咸

平三年春益州兵亂推王均為首既破漢州急來趨劍欲絕王師之路公告于衆曰賊來方銳孰可與鬪吾城無守具而有芻糧之積使賊能得之非徒肉吾一州必據險以阻大兵則兩川諸城無援以守盡下於賊矣不如焚其儲蓄擁州民輦庫帛退守劍門之兵合以拒戰賊可圖焉衆從之既而賊至得吾空壘無資與糧險不可據遂大沮其謀公知其窮手署榜以示寇曰爾等得無父母妻子之愛蓋脇從而來何不歸我復為王人得降卒千

有九百乃與劔門鈐轄裴臻併兵擊賊斬首數千
級敗走保成都公即馳驛入奏自引棄城守關之
咎且言乎賊利害帝深加獎歎擢拜度支員外郎
賜五品服俄而大兵得出劔門兩川諸城聞王師
來無復搖動均賊遂平如公始謀焉會帥臣言公
不當棄城朝廷方任帥不得已謫監虔州關征尋
召還判三司鹽鐵勾院時度支使梁鼎上言陝西
舊制許人入粟塞下率高其估以池鹽償之人得
賈于邊市今請借民力轉粟以備塞復轉鹽于邊

官自鬻之歲得緡錢三十萬以給西兵朝廷可其
奏命鼎為陝西制置使公上言非便復與執政諍
於帝前曰邊路阻險舟車不能通每歲轉粟與鹽
民力可支乎徒能奪農時沮商利異日農商失業
財力俱屈後復變法人將安信又官自鬻鹽則價
重價重則邊人市虜中青鹽食之虜為利矣臣請
通鹽商如前使人入粟塞下則農不奪時商不易
業外不為虜利苟能寬民力沮虜計雖緡錢不足
陛下以諸路之羨助之有何不可帝然之公謝以

忠憤而言不覺切直帝曰為臣當如此宜無改焉
鼎至陝西果無効而罷卒如公言領荆湖北路轉
運使歲餘徙陝西進司封員外郎賜金紫郎保任
能吏數十分掌權酷獲遺利益億計乃奏朝廷助
邊錢帛歲三十萬天子朝陵幸西洛進兵糧五十
萬石京西路乏粟又進三十萬石助之入拜祠部
郎中度支副使朝廷以兩河屯兵之計擇使為難
輟公以司封郎中領河北轉運使建言民乏泉貨
每春取絹直於豪力其息必倍本道歲給諸軍帛

七十萬不足則市於民請使民預受其直則公
私交濟制從之今行于諸道天子東封詔公駐澶
州同幹供億事慶成擢拜右諫議大夫領使如故
及祀汾陰又以公提舉京西陝西轉運使司事車
駕既行以長安為關輔之要命公鎮安之祀事畢
召還進給事中朝廷謂坤維之興宜得巨人拜樞
密直學士知益州期月詔還有圖任意會河朔關
須帝曰河朔未可無卿除都轉運使恩數廩祿加
常制一等公再至兩河夙夜其職積穀郡邑率如

京城議者謂所積太廣必將腐敗朝廷遣使視之
公奏曰豈不為九年之意耶帝悟遽命罷其使明
年大蝗民多阻饑公悉發倉廩以振之仍輦濟京
西路君子謂公知政矣大河決于無棣將圯其城
時以數州丁力晝夜營獲役死者相枕藉而水不
降公奏曰是不可以州矣請亟遷以避患朝廷從
之後數月大水出舊城丈餘民不為魚公之力也
就遷工部侍郎相州繫囚十四人盜瓜傷其主吏
以極法論公曰餓夫何至此皆貸死以聞朝廷閱

其奏即日下密詔民有歲凶為盜長吏得屈法以
全之公兩使河朔凡數年天子封泰山祀汾陰幸
亳社進緡錢繒纒糧芻鉅萬數又請罷內帑錢帛
歲百萬屢詔褒之魏人饑命公知天雄軍又東齊
大歛盜寇充斥進刑部侍郎知青州盜有聚山林
出為郡邑之患者先是係其妻子棘環于通衢公
至遽出之戒曰虐爾何贖爾惟從賊所之俟其自
新則復爾閭井賊聞之少懈又下教曰賊輩為魁
所制爾能伺而梟之吾將以功論旬浹盜有梟

二魁之有獻者餘皆散亡或來請命公錄之如教
齊人遂安天子遣中使獎勞之及為三司使陝西
舊科吏人采木送京師度三門之險破散者大半
又每歲市羊亦遣吏送而羊多斃于道二者吏皆
破產以償西人苦茲五十年矣公請募商旅送木
于京師如入粟法售以池鹽又請許其吏私市羊
以副之免關征筭得補其亡失自是西人鮮復破
產視天下之弊如此比者日更月除不可殫書矣
遷吏部侍郎以足疾求罷優詔不允而許五日一

至便殿奏事拜則以通事舍人掖之今上即位拜
尚書左丞復求解職朝廷優寵老成遂得請為同
州觀察使知陳州時大水侵城人有言水入城以
驚衆者公命立斬之人心始寧乃築大防以完其
州改同州復莅陳州會曹襄悼公得罪公以親累
授左龍武軍大將軍分司西京未幾進左衛大將
軍還長安故居後二年遘疾以天聖十年五月二
十六日薨享年七十四以其年八月二十七日葬
于京兆萬年縣白鹿鄉之原景祐元年其子詣關

理公有勞於國非意左遷天子憫然削追復同降
州觀察使娶太原王氏封平晉縣君早亡又娶馮
翊雷氏封延安郡君後公十六年而終男六人丕
顯不仕丕績同學究出身並早世丕諒太常博士
集賢校理由方畧改崇儀使邠寧環慶路兵馬鈐
轄後公十一年而亡丕緒尚書水部郎中丕遠殿
中丞丕旦國子博士女三人長適益州郫縣主簿
采肩遠次適曹襄悼公利用次適定國軍節度觀
察留後曹琮孫男若干人公性慷慨善辯論明於

知人凡保任才吏數百員掌力薦呂文靖公陳文
惠公又嘗薦太傅張鄧公公服官五十二載專尚
寬恕政刑之下活人多矣自古能臣言邦國之利
鮮不歛怨於下而傷其平者公則疏通利源取而
不奪允所謂善天下之計者也銘曰
舜歌南風兮阜時之財何以聚人兮易不云哉富
國彊兵兮孰謂霸才弗富弗彊兮王基其摧巍巍
先帝兮法道法天大業之盛兮包羅俊賢拔公之
才兮屬諸利權公之感遇兮惟力是宜封乎泰山

兮祀于汾睢千乘萬騎兮雲駕波馳公常景從兮
朝詢夕咨供億何筭兮無一不宜入司邦賦兮帝
曰汝通屢行大賚兮如泉不窮太上繼明兮遇之
愈隆公則請老兮命以觀風久於貨政兮人將無
徒公掌寬之兮民易以趨曾不加賦兮抑有羨餘
全歸故廬兮其樂只且安安而壽兮高枕以終門
閔不圯兮表于關中我我之碑兮章章厥功朕于
國史兮千古不空

墓誌銘

贈戶部郎中許公墓誌銘

公諱衮字公儀世為燕人皇考諱某王考諱某並
隱君子也避五代之難不榮以祿考諱某汶陽之
廬令累贈光祿少卿妣清河張氏贈河內縣太君
皆積德深長慶著來嗣公英秀而文與時會亨開
寶八年太宗之尹開封也龍德日彰髦傑之士其
嚮如雲是歲秋賦分鄉送名者比比焉及試藝公
為之首覆策于庭復在高等時登甲乙科者必更

州縣有唐之遺風釋褐除江寧府獄曹掾本路八
使言聽決詳明上既御大器北伐太原促召至行
在曰我姑試之除均州防禦判官郡將表其能狀
乃拜太子右贊善大夫通判姑蘇郡事時二浙之
地始歸朝廷宿政如繩公善解之就進殿中丞俄
拜奉常博士領曹南郡樹善屏惡新民耳目以前
均摧浙右坐聯職之累降品一等領饒陽錢監未
幾辨之移倅弋陽郡復官曲臺在郡七陳諫章上
愛其忠就遷本郡守受代至闕下復上策議并所

著文四十卷翌日召試禁庭上覽而嘉之曰南府
才冠吾不失人即以本官直昭文館賜服五品判
登聞鼓院由是四方之訟清而不壅以奉安先塋
請理覃懷郡出奉公家入敦孝事河內人歌焉又
西陲文州扼其戎險命公往刺遠人使之真宗即
位一日謂執政曰人君之言行也動乎天地不可
以誣命公修注記以先君之諱固請不獲須正人
也公在館三進秩至千職方員外郎因論邊事慄
慨動上心而改兵部方將圖任遘疾求解不得去

以景德二年四月二十九日終于京師武成坊之
私第享年五十七娶朱氏封永城縣君有子四人
伯曰珂祁州深澤尉仲曰琰有文與行擢進士第
今為太常博士奉朝請叔曰琦恭謹有立今為右
侍禁衛州兵馬監押季曰頊早亡一女適進士張
濤朝廷贈公尚書戶部郎中進封夫人河南縣太
君子登朝也以某年月日歸葬于懷之河南縣某
鄉某里銘曰
燕趙之英邦冢之寶親逢聖神首冠俊造翹翹入

穀郁都登瀛滌滯六曹淹恤百城晚歸內朝端立
右史直道始行怒飛爰止嗚呼遇豈不奇進豈不
時賢者弗違天平可疑塋于善地兮保以令嗣兮
亦公之意兮

滕公夫人刀氏墓誌銘

序曰塋者藏也欲人不得而見之也君子之思也
遠故復卜于山坎于泉又刺名與行從而祕之意
百代之下治亂之變觀其銘思其人而不敢廢其
墓斯孝子之心取諸大過初夫人之長子今祠部

外郎宗諒作諫官以抗章黜知玉山郡再舉菴池
陽之權酤俄而起倅江寧府事常謂池之九華山
上凌紫霄下盤洪流千巖白雲萬壑清風草木多
靈民人一照書契已降不知于文居者得其壽藏
者得其朽乃歎曰是可隱志焉是可宅先焉即奉
先公太博之靈葬于此山之金鷄原斯又大過之
意至矣哉時景祐之三載明年夫人無疾而終春
秋七十有二閏四月舉而祔之禮也夫人姓刀氏
其先譜史存焉皇考諱晃後唐天平軍節度判官

王考諱傑梁泰寧軍節度判官考諱允成皇朝贈
太子右贊善大夫夫人歸滕氏服勤婦道自先太
博之遺世也二子尚幼夫人夙夜誨導內惟節儉
外豐禮於賓客俾令人是親以就厥文行而祠部
君克承善志鴻軒鳳翥有風采于朝廷夫人累封
渤海縣太君次子宗元就養于家未登祿仕二女
適名族稱其禮範夫人之性柔而明端而慈曉文
翰通名理事長如不克撫下如不及居大族餘五
十載門中無間言及子以言貶顛沛於江湖間夫

人從之未嘗出憂語知事君之然也難哉故生享
德於慶閭沒反真於福地某於祠部同年之執也
嘗入拜于堂上知夫人之賢而敢述焉其銘曰
九江之上九華之中孝子宅親厥思無窮茫茫萬
年高岸可邈尚有人馬來此拳拳曰賢哉滕公夫
人之墓再拜而去

都官員外郎元公墓誌銘

公諱奉宗字知禮其先臨川大姓危氏也皇考諱
仔倡唐信州刺史避揚渥之亂東依錢氏時朝廷

命討淮南未行而終因家於餘杭王考諱德照為
吳越王相僅三十年賜姓元氏累贈太保考諱秀
文典吳越書命累贈太僕少卿妣陳氏贈馮翊縣
太君少鄉子五人曰興宗象宗宜宗道宗公即幼
子也三人事忠懿王有儒術皆補為郎象宗忠懿
之胥也從而還朝以文召試拜光祿寺丞公精於
詞律景德中天子臨軒試天下士公中甲科初命
歙州績溪縣事再命常州武進令皆以廉愛稱遷
漳州從事故鎮牧錢公惟濟洎數朝賢文章保任

除忠正軍掌書記俄改淮南幕本道按刑使采公
理行以聞擢拜太子中允領淝川權酤朝廷以西
蜀天下之富肯者吏嚙民膏怨所由生階之為亂
宜清舉者往焉公例改知蜀州晉原縣今上即位
遷太常丞賜服五品還知通州海門縣遷博士入
拜尚書七田外郎有監郡之行公以思事松楸願
得餘杭一閑局莅之詔從其請再期求分務南都
尋告老歸姑蘇郡朝廷恤之補一子官又以籍田
之慶進都官外郎景祐戊寅歲十月丙戌考終于

永定里第之寢享年七十有八始娶吳氏再娶李
氏封壽安縣君公三子昞曄曠皆舉進士昞從其
補今為歙縣簿曄曠並策名曄不赴調曠解官俱
就養左右及公之喪勺水不入口者三日公孝悌
之性不避禍難初江浙始下關譏甚嚴衣冠之族
咸促赴闕下無敢私歸公聞太夫人之憂晝匿夜
馳以及於塋兄道宗有才名不就世祿舉天府進
士為搢紳先生所推諾公友事之如在膝下易衣
拜食不改其樂有兄子翼幼依於公愛之如傷教

之若不及以至于成宗黨稱焉相國潁川公曩司
澗漕公在武進諸郡有難獄多命公決之在海門
日患斥鹵之澤民無甘飲及卜良地鑿大池廣方
百步積泉裒文自是雖甚旱暵人常賴之又邑有
大瀆亘數十里堙而不治公抗議籍力導至于海
人咸利焉公退十餘年創竹亭花圃遊遙其間多
素食清居非有道者不接晚年制斂服葬罷而命
諸子曰吾死之日必歸我于父兄之側魂如有知
得事親於地下諸子如其教以其年十二月甲申

塋于錢塘履孝鄉峴阨嶺之先塋禮也某以公年
德嘗修鄉丈之禮而敢銘焉

榮華之衢奔者無極公乎何心却焉而息孝友之
風樹者無幾公乎何心沒焉不已遷惠于民抱道
于身于嗟君子吾不知夫古人

贈兵部尚書田公墓誌銘

公諱錫字表聖世為京兆人唐德之衰徙家于蜀
昔武王封舜之後於陳春秋時公子完如齊子孫
遂大食米於田而命氏焉厥後將有穰苴相有千

秋斯可謂之著矣大王父易直王父成皆隱君子也文而不耀父懿因公之貴累贈尚書左司郎中善教于家嘗命公曰汝讀聖人之書而學其道慎無速為期二十年可以從政矣公服其訓拳拳然博通群書東游長安昌黎韓丕復居驪山白鹿觀數年器志大成拔王府薦有聲于京師太宗皇帝親策天下進士擢公第二人時太平興國三年秋也釋褐除將作監丞通判宣城郡召還改著作佐郎俄拜右拾遺直史館賜五品服出為河北轉運

使改知相州就除左補闕移桐廬郡遷起居舍人還判登聞鼓院尋以本官知制誥進兵部員外郎充職以直言改戶部郎中出守淮陽以留獄之謗左降海州團練副使起為工部員外郎直集賢院復戶部郎中真宗皇帝即位遷吏部郎中判審官院兼通進銀臺封駁司賜金紫求出典海陵郡還臺兼御史知雜拜右諫議大夫史館修撰以咸平六年十二月十一日終于私第享年六十四公身白衣已有意於風化上書闕下請復鄉飲禮又請

修籍田禮及在朝廷知無不言太宗初既取太原
范陽未下帝怒不賞平晉之功中外竄然而莫敢
言者獨公上書論諫理意深切帝感寤璽書褒答
賜內帑錢五十萬僚友謂公曰今日之事鮮矣宜
少晦以遠讒忌公曰事君之誠惟恐不竭矧天植
其性豈一賞之奪耶在河朔暨相州累章論邊事
至桐廬郡以吳越之邦歸朝廷未久人阻禮教邈
如也公下車建孔子廟教之詩書天子賜九經以
佑之自是睦人舉孝秀登搢紳者比比焉在郡聞

禁中火拜章極言上嘉之及還眷遇愈隆會乾明
節館閣多進詩歌帝獨喜公之辭乃依韻和賜令
宰相宣付公又上封禪書謂五代之亂人如豺虎
不圖復見太平宜崇檢王之禮以答天意公在西
掖會京畿太早禱祠無應遂抗言切於時政故有
宛丘之行咸平初出使秦隴超上三章言陝西數
十州苦于靈夏之役朝廷為之感然出海陵之初
以星文示變拜疏請降詔責躬上奉天誠真宗皇
帝嘉其意屢召對便殿及行降中使撫安仍加寵

賚爰有翰林學士承旨宋公白舉公賢良方正以
副天下之望一日召對久之且曰陛下以皇王之
道為心臣請采經史中切於治體者上資聖覽帝
深然之乃具草以進手詔荅曰卿能演皇王清淨
之風述理亂興亡之本備觀鑒戒朕心渙然所撰
三十篇皆隱其目公奉事兩朝由遺補歷御史至
諫議大夫前後章疏凡五十有二嘗謂諸子曰吾
每言國家事天子聽納則人臣之幸不然禍且至
矣亦吾之分也及終有遺表陳邦國安不忘危之

意其家弗預焉天子怛然命中使賻之有制痛悼
贈工部侍郎二子改大理評事持喪中並給月俸
哀榮之禮可謂至矣後以二子登朝累贈兵部尚
書寶元幾年某月某日與夫人合塋于泗州臨淮
縣某鄉之某原禮也公娶揚氏再娶奚氏封江陵
縣君能循法度以配君子二子長曰慶遠今為駕
部員外郎次曰慶餘今為比部郎中並克奉堂構
有能政于四方女三人長適王氏次適龐氏李適
張氏皆以婦道稱公動必以禮言必有法賢不肖

咸憚伏之出處二十年未嘗趨擢貴之門在貶廢
中樂得其正晏如也著文章成五十卷目之曰咸
平集行於世論者曰在大禹時臯陶矢厥謨在湯
武時伊尹周公為之訓誥故教化紀綱莫盛於三
代而子孫有天下皆數百年秦滅詩書其風丕紹
至西漢得賈誼董仲舒其言可以追先王之烈而
弗克施使後世王者無復起三代之心由漢始也
聖宋定天下太宗銳意太平真宗之初復親擢俊
人如田公之徒並見獎用惜乎不終其才豈皇天

之意特厚於古歟某幼聞高風未嘗游於其門今
駕部書先君之履業索文於江外某敢約而修之
又采舊老之言而作銘云

嗚呼田公天下之正人也言甚危命甚竒盡心而
弗疑終身而無違嗚呼賢哉吾不得而見之

兵部侍郎致仕胡公墓誌銘

寶元二年六月十八日尚書兵部侍郎致仕胡公
薨千餘杭郡之私第明年二月十有一日塋于杭
之錢塘縣南山履秦鄉龍井源以夫人潁川郡君

陳氏祔焉禮也孤子楷泣血言于友人范某禮經
謂稱揚先祖之美以明著於後世此孝子孝孫之
心也然而言之不文行而不遠處喪之言烏乎能
文今得浙東簽書寺丞俞君狀先人之事而敢請
誌焉某曰孔子見齊衰者必作重其孝於親也敢
不唯命公諱則字子正婺之永康人也昔虞舜之
後有胡公武王封於陳蓋族望之來遠矣皇考諱
彭王考諱澂皆隱於唐季其道不顯考諱承師在
鄉閭間以積善稱因公而貴官至尚書比部員外

郎贈吏部郎中妣應氏封永樂縣太君贈普寧郡
太君公少而侗負氣格錢氏為國百年士用補
廕不設貢舉吳越間儒風幾息公能購經史屬文
辭及歸皇朝端拱二年御前登進士第釋褐為許
州許田尉以幹自聞補蘄州廣濟宰又補憲州錄
曹以本道計使諫大夫索公湘之舉改祕書省著
作佐郎簽署貝州節度觀察判官公事升本省丞
知潯州拜太常博士提舉二浙榷茶事兼知桐廬
郡丁太夫人憂服除以本官知永嘉郡遷屯田員

外郎提舉江南路銀銅場鑄錢監擢任江淮制置
發運使轉戶部員外郎入為三司度支副使賜金
紫除禮部郎中京西轉運使又移廣南西路轉運
使以戶部郎中充江淮制置發運使轉吏部郎中
比太常少卿丁先君憂終制知玉山郡移福唐郡
拜右諫議大夫知杭州入判流內銓以舉官累貴
授少常知池州未行復諫議大夫知永興軍領河
北都轉運使給事中入權三司使拜工部侍郎集
賢院學士知陳州進刑部再牧餘杭郡踐更中外

凡四十七年得請加兵部侍郎致仕朝廷命長子
通判錢塘以就養又六年而終享齡七十有七天
子聞而悼之進一子官初至道中公在憲州時西
寇梗邊朝廷命師五路入討詔具三十日糧以從
之索公方引公督隨軍糧草事公曰為百日計猶
或不支奈何索公乃遣公入奏召對逾刻公陳邊
事如指之掌上顧左右曰州縣中有如此人遂可
其奏且示甄拔之意後大帥李繼隆果與寇遇十
旬不解索公曰微子幾敗吾事一日其帥移文曰

兵將深入糧可繼乎公曰師老矣矯問我糧為歸
師之名耳請以有備報之索從其議彼即自還無
以咎我其先見如此及索公主河北計又奏辟之
遂以貝州之行朝廷遣使省天下冗役就命公行
河北道凡去籍者僅十萬數民用休息在潯州人
有虎患公齋戒禱城隍神翌朝得死虎于廟中其
誠之效歟按池州永豐監得匿銅數萬斤吏懼當
死公思之曰昔馬伏波哀重囚而縱之前吏義焉
今銅尚在吾忍重其貨而輕數人之生耶咸以羨

餘籍之不復為坐在江淮制置日會真宗皇帝奉
祀景亳公實主其供億千乘萬騎至于禮成無一
毫之闕帝深愛其才面加獎勞遂進秩登于計相
之貳在廣南西路有大舶困風于遠海食匱資竭
久不能進夷人告窮于公公命瓊州出公帑錢三
百萬以貸之吏曰夷本亡信又海舶乘風無所不
之公曰遠人之來不恤其窮豈國家之意耶後夷
人卒至輸上之貨十倍其貨朝廷省奏而嘉焉又
宜州繫重砵十九人時有大水公不慮患而特往

辨之治者九人焉在福唐有官田數百頃民輸租
食利舊矣至是計臣上言請就鬻之責其估二十
萬貫民不勝弊公奏之未報章三上且曰百姓疾
苦刺史當言之而弗從刺史可廢矣乃有俞詔減
其直之半而民始安公領三司使寬於財利不以
刺下為功時上方以兩京陝西官鹽歲久民鮮得
食而日以犯法命通商有司重其改作公首請奉
詔其事遂行公性至孝自曲臺丁太夫人憂廬于
墓側以終喪紀有草木之祥本郡表之及京西之

行以家君朱紱為請上曰胡某為孝雖非其例與
以明勸也縉紳先生榮之又天禧中尚居郎署朝
廷擬公諫議大夫知廣州公以家居八十歲懇辭
于政府乃復有制置之行尋以哀去職得盡心於
喪塋公富宇量篤風義往往臨事得文法外意人
或譏之公亦無悔焉其輕財尚施不為私積士大
夫又稱之福唐前郡將被訟去官嘗延蜀儒龍昌
期與郡人講易率錢十萬遺之以歸事在訟中及
公下車昌期自益部械至公曰斯何罪耶遽命釋

之見以賓禮法當償其所遺公代以俸金仍厚遣而還又濟陽丁公為舉子時與孫漢公客許田公待之甚厚及其執政而雅故之情不絕若林感士人而未嘗預暨丁有朱崖之行昔之賓客無敢顧其家公實被議出玉山郡尚屢遣介夫不遠萬里而往遺焉此又人之難矣及退居西湖乘畫船擊清波深樽雅絃左子右孫與交親笑歌於時歲之間浩如世人不謂之賢乎夫人潁川郡君有慈和之德先以壽終令子四人長曰楷都官員外郎前

知睦州祥符七年秋登服勤詞學科所至政能有先君風度次日湘好學有志識朋友多之次日桂俊異居喪而亡次日淮孝謹有成人風二女長適泉州德化縣尉蘇蕃次適御史臺主簿華衆而亡其閨門之範見其潁川之誌某非特為重齊衰之情掌倅宛丘郡會公為二千石以國士見遇且與都官布素之游誠可代孝子而言焉銘曰
進以功退以壽義可書石不朽百年之為兮千載後

胡公夫人陳氏墓誌銘

詩稱采蘋夫人不失職也夫人之職莫先乎舅姑
其肯以事居蘋蘩以事往故可以配君子正家道
也夫人姓陳氏金華郡之令族曾祖諱晦祖諱資
父諱文諭皆樂善于家不從仕宦夫人幼賢父母
篤愛擇公而妻之及公中科第累調遠方二親樂
閭里與姻族游夫人願侍左右不從公行凡二十
年縫衣爨飧必躬親之至舅姑之終與公執喪三
年然後就公官所此夫人大節無愧天下之為人

婦者有聲詩之義焉又性好禮自少至老對公如
賓客加以純儉而仁笄服之餘皆均于親之貧者
夫人自公登朝封上黨縣君公為諫議大夫進封
本郡君寶元元年秋九月寢疾乃齋沐易衣怡怡
而終享年七十有九以三年二月十一日與公合
塋于履泰鄉龍并源禮也子四人長曰楷都官員
外郎次日湘曰桂曰淮並太常寺太祝二女習夫
人之教柔淑有禮宗黨稱焉長適蘇氏次適華氏

銘曰

惟孝惟禮作配君子伊夫人兮至矣

寧海軍節度掌書記沈君墓誌銘

吳興郡太守滕侯下車求故同年沈兄之家得諸
孤問其墳墓曰貧未之葬滕侯傷之乃謀于僚屬
卜善地揀良日其禮悉備以寶元三年二月某日
葬于德清縣之永和鄉大壯嶺君諱嚴字叔寬世
為本郡人其先食邑於邲後子孫失國而為沈氏
漢晉而下代有其人曾祖諱規祖諱廷誨父諱延
岫皆隱而不仕叔寬幼負器識服親之教宗經屬

文有聲于江表大中祥符七年秋郡國敦遣有送
于禮部明年春禮部較天下之才奏叔寬第四人
天子命試于庭中甲科除南康軍判官三載有善
績改宣城節度掌書記國家興山澤之利主計等
薦君洪州武寧之茗局外臺上請兼領本邑事朝
廷從之既而吏畏其廉民愛其慈君子謂之善政
餘杭郡權酷歲金二十萬貫為諸郡之劇主計又
奏君尸之三年而還會故叅政蔡公居守南都以
同年之游惜其沉俊辟為留守推官其年秋七月

以疾終于官所享年五十叔寬孝悌于家事其親未嘗違顏色視兄之孤必先於己子與人交篤於義信善人君子無不樂見之及聞其亡皆相弔云天與其才也又賦其行也而不及其顯以壽也悲夫三子曰祁曰邵曰郁並從儒學必有立者二女長適前進士陳經次女未笄長女之嫁蔡公不遠千里命齋金以送之及君之塋又滕侯極意以營之有以見叔寬感人之深也如此某同年之列最相知心故書之銘曰

叔寬叔寬生兮可愛歿兮可傷友朋之望兮子孫其昌

戶部侍郎贈兵部尚書蔡公墓誌銘

寶元二年歲次己卯四月前叅知政事戶部侍郎蔡公薨天子悼之卿大夫憂之國人傷之上命三公舉行典禮贈兵部尚書謚曰文忠以康定二年歲次辛巳十一月某日塋于許州陽翟之某山公諱齊字子思其先周之子孫累封於蔡因以著姓秦漢以降代生偉人曾祖紹贈太保洛陽人也嘗

宰萊之膠水居官九年民愛以深遂家焉祖諱鄰
贈太傅隱居丘園以墳素為樂考諱夢臣累贈中
書令博通經史善時筆與宗族居鄉黨稱其孝友
娶楚國太夫人張氏而生公教之親仁賓來如歸
公幼而神秀眉目廣聳見者異之嘗依外舅劉氏
學于彭城今相國隴西公廸時為監郡得公詩語
嘆曰渠有大志宜善視之大中祥符八年春真宗
皇帝臨軒以文考天下之士公中第一及引對文
陛堂堂英偉進退有法上大悅顧謂寇萊公曰得

人矣特下詔俾金吾給七人清道自公始也釋褐
除將作監丞通守充海郡移北海郡召還以大著
直集賢院主判三司開拆司賜服五品今上即位
拜右司諫同修起居注改禮部員外郎兼侍御史
知雜事賜金紫歷戶部度支二副使遷起居舍人
知制誥同知審官院既而召入翰林為學士兼侍
讀學士轉禮部郎中龍圖閣學士守西京以便親
求為高密郡徙南京入除左諫議大夫權御史中
丞尋改給事中復充龍圖閣學士權三司使拜樞

密副使進禮部侍郎參知政事以戶部侍郎罷終
于汝陰郡享年若干楚國在堂君子哀之公之弟
秘書丞稟甥著作佐郎冠平幹公襄事中山郡夫
人劉氏哭泣三年至于疾廢二子尚幼曰延慶太
常寺太祝曰延嗣秘書省正字長女適試將作監
主簿劉庠次女在室而某自布素從公之遊見公
出處語默無一不善門中奉親日視其親色請公
昆弟愛之如傷先朝采拔以輔相器之當遺弓之
初公懷哀慕不能食者數日家人視其衾衣涕泗

霑濕公病汝陰聞拓拔僭稱嚆吁感槩教弟稟言
西事甚詳蓋忠孝之性發之天也公於親舊間雖
死生不易彼有孤遺則必為之備嫁娶又好學無
倦未嘗不以名教為急孔子之後世襲文宣公嘗
宰曲阜乾興中四十九代孫承祐卒遂廢十餘年
公聞承祐有母弟在抗章請復其嗣有詔從之其
立朝也能清其心高其行未嘗取於人明肅太后
時用事中貴人董修景德寺時公在翰林詔為之
記中人求公善辭許以不次公遲之不進故被誣

而出至高密會歲饑公請蠲諸州稅又力請放海
利以救東人于今賴之公兩居憲臺方嚴不動百
辟畏其風權威有過則彈劾不隱未嘗求其下也
明肅之終莊惠復立閣門促百僚賀公毅然正色
目臺吏不得追班前白執政遂罷自是莊惠損抑
禮數有力焉在樞密院海南奏交趾八百餘人避
本國之虐以歸我議者謂不如還之恐生邊患公
曰當內之荆湖間活以閑田柰何求生而來委之
兇虎蠻亦人也義必不還苟散為民盜從而戮之

酷又甚焉爭之不能得後果為亂捕之歲餘宜桂
以西皆警朝廷患之公猶有愧色在政府浩然示
至公於中外以進賢為樂以天下為憂見佞色則
嫉聞善言必謝孜孜論道以致君堯舜為心與大
臣居和而不倚正而不訐無親疎之間有方大之
量朝廷為之重刑賞為之平及其出也未踰歲時
而天子思之公遽不起嗚呼公之生也天有意也
公之亡也天無意乎使在位而壽則道德功名非
竹帛之可勝矣銘曰

泰山之東齊魯同風厥生我公我公堂堂觀國之
光亨于真皇真皇上僊隕血漣漣欲報昊天今上
聖神廼眷正人參于國鈞純德坦坦平心浩浩進
退惟道恕以待物誠以報國仁人之德天乎天乎
豈不有心奪此令人我懷憂深箕山我我潁川悠
悠山為限兮川為丘公之名兮與日月留

尚書度支部中充天章閣待制知陝州軍府

車王公墓誌銘

孔子曰善人吾不得而見之矣噫先聖謂善人之

難得也如此世有德之清行之方政之平斯不謂
之善人乎余見之於子野王公矣公諱質字子野
其先太原人曾高占籍大名皇考諱徹以文行顯
至左拾遺累贈太師尚書令兼中書令魯國公王
考諱祐雄文直道名重海內掌太祖誥命至兵部
侍郎累贈太師尚書令兼中書令晉國公考諱旭
以公正果敢屢當藩寄為時之良二千石累贈兵
部尚書妣虞氏贈某郡君公稟嚴君之教幼而有
文伯父文正公為真宗朝賢相重德大器人莫可

動一日覽公之業喜甚作詩以獎之謂吾門未衰
矣用文正廕補太常寺奉禮郎三遷至大理丞文
正既薨公年尚未冠進所著文真宗嘉之召試學
士院辭入優等賜進士及第名動京師嘗師事楊
文公文公器之每謂朝中名公曰是子英妙加於
人遠矣時翰林劉公筠風岸高峻縉紳共仰不得
其門而進乃與禁中諸公共薦公之才敏天子命
公校文于館中歷殿中省丞為博士於太常加集
賢校理拜祠部外郎丁兵部憂服除以前官充識

同判姑蘇郡以公心公言正二千石之政二千石
初不平之終服其義而加禮焉還朝賜五品服章
改度支外郎同判尚書刑部又判吏部南曹進司
封外郎出領淮西郡部中十邑素多盜與訟號為
難治公至斷獄必以情按吏必有禮橫者繩之弱
者持之州人大服謂往之史君莫公若也蔡俗舊
祠吳元濟公曰豈有逆醜而當廟食耶吾為州長
不能正民之視聽俾民何從哉狄梁公李太尉皆
唐之忠烈又德加蔡人胡為不祠命工撤元濟廟

建二公之祠率吏民拜祭人從之于今號為雙祭
廟秩滿拜祠部郎中朝廷除公開封府推官除兄
雍三司判官公曰皆是要職吾兄弟同日除拜朝
廷豈乏人哉乃堅請外補願留兄京師以奉家廟
士大夫聞而賢之往守壽春郡期月改合肥郡盜
有殺其徒以并其財者吏擒之公令處死法寺議
當貸死遂劾之公上疏曰盜以彊力而又殺人吏
追而擒之非自露而悛者胡為而貸焉如法寺所
論能害其類者皆無罪名民將競為盜盜已而殺

一夫其黨咸赦之盜可止乎疏上不報凡斲獄出
入以下吏為首長官為從公曰吾不勝法吏矣上
言請為之有朝廷從之左降監舒州靈仙觀後一
年今資政殿學士昌黎韓公琦知審刑院議盜殺
其徒非自有而悛惡者宜勿原之朝廷始頒示天
下且知公前所斲獄不為失矣又今資政殿學士
鄭公戩翰林學士葉公清臣皆論公奇才未大用
而非辜坐黜豈朝廷之意耶詔起公知海陵郡代
還除度支郎中荆湖北路轉運使時西陲宿兵財

用為重諸道轉運使競進羨餘幾千萬勦助軍之
獎實瘡痍細民以為已績公至而歎曰西兵天子
不得已而用之然湏千財賦豈如是而迫耶吾不
當為由是荆湖之民賴公少休焉會資政殿學士
富公弼拜職尚書史館修撰與公未嘗識面聞其
風義舉公以代修撰朝廷從而除之無掌選事及
韓富二公在樞府又交薦公清方為搢紳之冠天
子俞其奏擢以本官充天章閣待制依前掌選事
公再讓不允既而客有扣公曰銓衡至重利病多

矣公無建明者何公曰綱紀盡在如權衡然但持
者輒高下其手爾何必易其器耶公居之歲時選
士賴其平其間人物清濁公必辯之上前量有進
抑振天官久墜之職也天子以西北數藩鎮皆湏
巨人乃擇近列而褒遣之公得嶺陝州州當四達
之會又用兵而來吏民疲苦公至則緩征賦薄迎
勞屏允寇極孤弱人廼息肩幾一載而感疾以廢
曆五年七月二十六日終于黃堂享年四十五靈
柩歸東都州人哭送于道朝廷加贈公生相門而

弗驕弗華以貧為寶文正作舍人時家甚虛嘗貸
人金以贍昆弟過期不入輟所乘馬以償之公因
閱家藏書而得其券召家人示之曰此前人清風
吾輩當奉而不墜宜秘藏之又得顏魯公為尚書
時乞米于李大夫墨帖刻石以摸之遍遺親友間
其雅尚如此故終身不貪所至有冰蘖聲此公之秉
德不亦清乎公充職館殿二十餘年同舍皆顯官
公介然不動惟求外補當國者非戚必舊公未嘗
折顏色屈語論以合其意嘗有交游以言事被謫

朝之貴人皆切齒公特率昆弟祖宴都門謫者拒
之曰無為子之累乎公曰吾願為黨人從而貶之
光矣此公之執行不亦方乎公為數郡皆清心以
思治行已以率下必有崇學校而風化之人有犯
法非害于物者必緩其獄未始深文焉求民之疾
雖處幽不遺去民之梗雖負勢不避此仁人之政
不亦平乎故每去一州則百姓號慟如赤子之慕
慈母也公性純孝與家人道先君事必感激泣下
故厚於宗族每拳拳焉憂樂同之弟素文正之子

也自淮南外計改涇原經畧使公食不甘寢不安
曰弟有母老且疾吾無親憂因人對請代行既而
弗許命其愛子規曰彼窮塞也得無危事汝可侍
行而左右之以均吾憂又少弟端嘗不利于春官
處徒勞者久之公為郎以歲課當遷願移厥恩召
端一試朝廷許之賜端進士出身其友愛之心有
如此者公不治生業惟畜書僅萬卷遠近從之兼
通佛老微旨撰寶元總錄一百卷皆聖賢窮理盡
性之說公樂稱人之善必曰吾不及矣在士大夫

非風義高遠弗與之游及其逝矣四方交友書問
相吊云前年吳安道死今年王子野卒賢大夫之
清者何其衰歟公娶周氏故禮部侍郎起之女封
褒信縣君生子男三人曰恣將作監主簿曰復太
廟室長女二人長適太常寺太祝范純仁次女尚
幼余走塵土時公一接如舊以道義淡交者有年
矣結二姓之好以親仁人余常期公以青雲之蹕
大有立於國朝今不幸乃為公之墓銘銘曰
嗚呼人之清者曰賢國得而治焉性之仁者曰壽

民得以庇焉何子野之善人兮逝矣如川惟清方
而平正兮居人之先在聲詩之有言兮胡不萬年
忍送之于野兮壘之于泉徒切切於辭兮勒石之
堅期子野之令名兮與白日而長然

太常少卿直昭文館知廣州軍州事賈公墓

誌銘

公諱昌齡字延年其先鎮陽人以仕宦遷徙今為
開封人也曾祖諱某唐末起家備嘗險阻屬文之
外長於撰述以唐武宗而下至僖昭皆無實錄乃

以傳聞并諸家之說著唐年補錄六十五卷識者
稱之居石晉朝知制誥至周為給事中史有本傳
祖諱琰有才識字量太宗在藩邸相得有素領開
封尹辟為推官及即位擢拜正諫大夫樞密直學
士期以輔相將討河東與大臣議將帥上曰非琰
不可會寢疾不起上軫悼之憂形于色贈尚書左
丞國史有傳父諱汾以氣義稱位不充量終于殿
中丞公少孤太夫人愛之以待其成公天然好學
甘於清苦時翰林李公宗諤有望於朝名實之士

多出其門公依之有年以文行自立門下士咸推
重之一上登進士第釋褐為饒州浮梁尉彼俗陰
狡與人有怨往往食毒草而後鬪即時斃仆以誣
其怨者公至必反覆省視自此被誣之人多昭雪
焉秩滿除開封府功曹參軍在職修舉府中常推
委之會大夫人寢疾公執藥餌不斯須去左右者
數月以憂解官哀毀之過宗黨稱嗟服除為許州
鄆城主簿本郡牧與外計使皆以文學政事交薦
于朝廷改大理丞宰蜀之江源縣人繁地狹積多

田詒公曰聽詒之明曷若使無詒乎及正其疆條
其弊以示於民自茲無爭焉時天下學校未興公
修本邑孔子廟起學舍俾邑之秀民群居焉公且
暮往勸導之自此江源始有舉進士者邑人于今
稱之皇上即位升殿中丞知宣州宣城縣未至有
江淮制置使舉公監海州權貨務疏達利路商賈
便之朝廷獎其勞改太常博士又遷屯田員外郎
既而三司使以公可通天下之利薦之領京師權
貨務三年稱職特除都官員外郎賜五品服徃倅

泉州遠人賴之遷職方員外郎俄拜屯田郎中知
衛州會州長不利繼亡者數人人無敢往士大夫
惜公之行或教以易其府署公曰吉山人乎死生
天乎於是弗易厥居而終亦無咎郡之共城有稍
田以供尚食水利有餘而民不與焉公使歲漑之
外與百姓共之天子以欽恤之懷憂及萬邦復先
朝提點刑獄使兩省近臣交上封奏舉公克職朝
廷從之命提點京西路刑獄事公性仁恕小大之
獄必盡心以聽郡邑之幽遠使車所不至者躬親

焉不事風威州縣九品必延見與語得其善則畫
一以聞見其過則教之使改雖職居按察而不忍
摘人之惡措紳稱其長者改度支郎中荆湖北路
轉運使下車訪能吏撤冗官部中諸郡例以公用
饋遺者一切不受西南夷人下溪州刺史彭仕義
隸于辰州而驕蹇但詐嘗因八貢訴州官于登聞
鼓皆不實朝廷弗欲較之責吏而已仕義益橫求
割近邊土民公遣吏直告之曰天子恩信及爾爾
狡而無厭我當擇於衆族求其可代汝者請之于

朝汝其圖之仕義始知懼盟不復敢訟改知潭州
潭荆湖之劇府人物繁會素為難治以公神明之
照雖千百其訟無毫髮之隱吏服民愛歌于道路
朝廷知公之重拜太常少卿直昭文館就鎮南海
始登舟感疾召諸子授以治命神思不亂以康定
元年八月二十三日不起公長厚之性資以明達
顛沛造次弗離中道寬而不懈直而不訐與人交
久而能恭當官而行未嘗違其正士大夫無不愛
其風度居家有節與親族同其有無常謂諸子曰

吾家清白可傳何生業之為啟手足之日門中索
然君子謂公之踐言矣娶三夫人高陽許氏中山
劉氏封長安縣君廣平宋氏封某縣君生八男長
曰寅有文學履業登進士第為絳州防禦推官與
次子廢俱不幸早世次曰蕃開封府封丘縣主簿
次曰常將作監主簿次曰當堂京岡並幼女五人
長適大理寺丞李競次適廬州舒城縣主簿主宗
懋次適河中府萬泉縣令高良佐次適孟州河陰
縣主簿州學教授蓋沂一女尚幼以某年月日薨

于鄭州新鄭縣抱章山之東南三夫人祔焉其既
交而親復其孝子之請而作銘云
邦之令人道醇德懿芝蘭之室瑚璉之器稟孝含
忠播仁殖義位于一方未博其施弗遐厥壽蒼蒼
曷意君子惜賢小人奪惠奕于鄭國卜云善地子
產在焉魂兮相慰

太子右衛率府率田公墓誌銘

古稱陰有德於人者必享厥祥大厥後易不云乎
積善之家必有餘慶所謂不在其身在其子孫者

信矣公諱紹方其先鴈門人曾高家于冀自耶律
氏燬得石晉山後八郡又歲侵兩河聞王考諱某
被遷于盧龍署之以官復治產雲中而貨殖焉考
諱某能幹父之蠱其家益顯娶王氏而生公公少
稱才武抱氣重諾有燕趙之風義事耶律得親信
左右常從而南牧帳下多掠獲漢家士民俾公尸
之公默計之曰漢人吾曹也驅之如犬羊非有罪
辜將孥戮于虜中乃縱之夜亡者千計此德於人
多矣公亦自負謂大丈夫胡能老於異域哉考妣

既焚吾其歸歟乃匿身草莽會夜則負斗而奔既
達朝廷真宗憫然嘉之補職于三班以其勇果屢
委軍甲捕外方寇所謂巡檢者至則盜息民得按
堵公祥符中主邵之峽口寨時龍水郡蠻寇大擾
戍兵屢履峽口溪洞亦乘聲蕭聚一日近寨圍而
噪之公戒軍士曰我露其勇彼將整而難破不如
示之怯士敢先動者吾以軍法從事衆皆蕭然聽
命既夜公自率驍果突而擊之斬十餘級蠻雖衆
曾不能措手足大駭而奔自是終公之任不敢內

寇州將害其功不以上聞公曰吾自虜還漠獲從
王事足矣烏敢為功哉又嘗誨督諸子曰吾以漢
有聖人之風故脫身以歸今教汝詩書趨聖人之
道使汝輩有立吾將鼓歌以終天年豈病其不達
耶子况舉進士高第又舉賢良方正天子親問當
世治亂祥咎以對第一乃速進用四五年間掌西
掖書命為陝西道宣撫副使還朝敷奏稱旨乃詔
寵公以太子右衛率府率監瓊林苑金明池以便
子養士大夫榮之天子以尚憂西陲命充龍圖閣

直學士出領秦鳳路經畧使公在疾經畧屢求省
侍有詔敦勉遣中人尚醫軫視公以慶曆五年乙
酉孟秋月壬子不起享年七十有四上嗟惻之加
賜賻焉經畧累章哀訴得告奉公之喪以其年月
日葬于許州陽翟縣某原禮也公性剛直未嘗曲
於人然明恕少怒嘗官于閩中有愛馬使一卒乘
習遇危橋不下馬折足而斃公曰卒豈欲是耶不
復以一言詰之人皆服其度公娶李氏贈福昌郡
忍前十五年而亡生八男經畧即長子也次曰淵

有詞業舉進士以兄廕補試秘書省校書郎許州
鄆城主簿次曰沃漢幼亡次曰洵穎上主簿次曰
浹登進士第唐州團練推官次曰洸太廟齋郎次
曰泳皆業進士次小字寶哥尚幼三女長適海州
東海令張震次適辰州理掾高燾次適鄂州咸寧
令張子方皆以婦道稱于宗族某嘗與公會于丹
陽見公氣貌語言剛而質毅而恭使人信而愛之
又與經畧之游舊矣俾序而銘云
公復其家去狄而華公教其嗣挺國之器厥後旣

隆又壽而終天子賜為大夫弔焉非積德而胡然
資政殿大學士禮部尚書贈太子太師諡忠

獻范公墓誌銘

慶曆紀號之六載春正月丁亥資政殿大學士禮
部尚書知河南府兼西京留守司范公以疾薨聞
上悼之為不視朝制贈太子太師贈賻加等子殊
遷官者五人有司議行謚曰忠獻以其年某月日
葬于洛陽之某原某里附先塋也公諱雍字伯純
其先太原人皇考諱某後唐初為校書郎太師孟

公器之嘗辟居幕中後又從孟公入蜀霸業既成
遂為國相久之一日告老蜀主寵以太子太保就
第以疾終及公之貴累贈太保王考諱某在蜀為
刑部侍郎後歸朝終于左屯衛將軍累贈太傅考
諱某以太傅廕為供奉官終于合肥郡之監軍累
贈太師尚書令妣韓氏封安康郡太夫人追進京
兆郡實生二子公處其季十歲而孤家甚貧太夫
人遣公就學常質衣以為資公警悟過人挺然國
器舉進士咸平三年春御前釋褐補洛陽主簿再

調錢塘尉知已薦公廉敏改筠州從事秩滿以績
用除大理丞宰建之崇安縣遷殿中丞知端州還
朝獻所著文二十卷進太常博士初公為洛陽主
簿實典廩納而邑多權要公必先細民而後形勢
時尚書張公詠道過洛陽聞其事乃紀公姓名署
之于屏常指以示人曰識斯人否至是張公鎮淮
陽致書于寇萊公道公之才復奏公為淮陽倅成
命未行會萊公出守西洛辟公貳留守司朝廷俞
之張公曰奪我賢倅耶公自茲名重朝廷改田曹

外郎主判三司開拆賜五品服天禧中河決滑臺
齊魯承其弊朝廷遣兵數萬人塞其橫流千里之
民皆奔走負薪芻邑官荷校以督其事民不堪命
天子患之命丞相暨主計擇人以徃僉以公為允
除京東轉運副使至則度河之勢量工集材邑官
皆釋之與緩期不煩而濟河防既就進度支外民
郎河北轉運使列塞積兵計糧為大民租不能給
須重其穀價募商以內之縣官苦其費公視德博
間地惟沃饒菽粟易斂又河渠通于塞下大可致

之乃輦諸州緡錢就以平糴方舟順流集于邊廩
自是河朔財用周于供億朝廷患陝西兵食不足
困于轉饋命公克本路轉運使賜三品服公至則
先寬其民不使遠輸募人入粟塞下給以池鹽商
嗜其息而農得以休上即位就遷兵部外郎召拜
戶部副使尋改度支副使未幾拜工部郎中龍圖
閣待制充陝西轉運使踰年召還提舉京百司會
環原州屬羗叛起大為邊患遣公安撫乃見其首
長諭以恩威昂時嚮順還朝拜右諫議大夫權三

司使旋奉使契丹國以專對有體加龍圖閣直學
士主司如故公好訪問善開納天下金穀之利病
灼然居目中上知其才拜樞密副使歲餘丁太夫
人憂制以給事中起復視事籍田禮畢遷禮部侍
郎時王清昭應宮災兩府簾對章獻太后泣曰先
帝崇奉此宮一旦至此賴東北隅猶存一二小殿
公揣知有復興之意因抗言曰先朝極土木而成
此宮一夕為燼豈天意耶如因其所存復欲興之
民將弗堪不如焚之之蓋也諸公恊其對章獻意

解曰不復勞人矣上說翌日下詔以諭中外烏又
嘗繪尚書四代圖進之以備中覽居密府六載叅
掌機務知無不為明道二年以戶部侍郎知陝州
踰月移京兆府其年諸道旱蝗人復疾疫於關中
為甚百姓轉于溝壑公先戒廩祿復損民有餘以
振之活數萬人每人躬自撫視至染厲氣卧疾者
久徙鎮河陽暇日念國家禦戎之備率多弛廢西
羗狡狠必有窺邊之心思不克威豈久安之勢乃
感激上言而得入覲陳安邊六策上深加采納進

吏部侍郎資政殿學士出守西京既而西戎果叛
上咨歎之授公振武軍節度使鎮延安時守備未
完屯戍尚寡公累章乞師朝議小其寇不甚為意
一日元昊驅衆十餘萬於延安城會大將石元孫
領兵出境上城中守者纔數百人公身被甲胄復
呼民登埤日夜嚴守遣使召統帥劉平于慶州平
領軍來援合元孫兵與賊夜戰王師不利二帥陷
歿城中大恐無可守之勢公曰延安西夏之咽喉
也如將不守則關輔皆危今人力窮矣奈何郡南

有嘉嶺山其神素靈乃望而禱之曰我死王事足
矣生靈何辜為虜魚肉神享廟食于茲土其無意
乎厥暮陰晦雨雪大下寇兵暴露不知所為乃晝
夜引去延安遂完朝廷聞之封其神曰威顯公斯
又至誠之感為不誣矣然二帥既歿累公左遷戶
部侍郎知安州延安吏民百數詣闕號訴謂城當
陷而存民將殞而生皆公之力也天子惻然故一
歲間起公吏部侍郎知河中府未行改京兆府且
許朝覲上優遇之加資政殿學士赴鎮歲餘以撫

安關輔之勞改尚書左丞進大學士俄而復守西
京有群盜集于襄鄧浸淫汝洛間朝廷委公營之
公夙夜乃事遣兵驅退魚示恩貸故其寇歸者半
戮者半民用樂業歲乃大登朝廷有詔褒之又言
事者以西事而來收兵太冗宜遣使擇去以寬其
費朝廷從之軍中徃徃偶語公密疏謂急而用之
緩而棄之不可上乃止公保釐三歲拜禮部尚書
時已抱疾至終之日洛人悲焉公常志在補益奏
藁累篋及其沈痾聞朝廷有事于田狩猶拜疏忠

切以盡其心公性恭和有風鑒門下所舉多至貴
顯為時名卿藏書僅萬卷惟小書五經則常提携
左右不可一日無此與岷山處士龍昌期論易深
達微奧以昌期所著書奏御遂行於時公著明道
集三十卷後集十卷彌綸集十卷雖高年貴位而
造次不忘于學初娶魏氏追封鉅鹿郡夫人再娶
臧氏始封遂寧郡夫人改仁壽郡男六人長曰宗
傑兵部員外郎直史館陝西轉運使三路制置解
鹽使先公一年而亡次宗良宗衍並守將作監主

簿次宗古皆早亡宗師宗賢今並太常寺太祝女
十人一適眉州防禦使高繼宣三人在室六人早
亡孫男六人子開子明並大理評事子儀太常寺
奉禮郎子諒子奇子淵將作監主簿孫女七人曾
孫女二人公約于身勞子國周旋四方始終一節
又政惟慈恕不任威罰今二子六孫秀異簪紳豈
陰德之在歟某素為公之所知又諸孤以公善狀
求為之銘銘曰

邦之偉人念德不怠勤勞王家四十七載入輔樞

軸作為股肱皇猷克贊天眷是膺出臨藩宣允專
節制蹈乎憂患濟以忠義政本乎仁行執乎恭夙
興夜寐則善之從歲月靡靡終于壽紀典禮具舉
神靈以喜葬于先塋舊栢青^青子孫尚蕃承祭祀
兮惟寧

東染院使种君墓誌銘

君諱世衡字仲平國之勞臣也不幸云亡其子泣
血請銘於予予嘗經畧陝西知君最為詳懼遺其
善不可不從而書之初康定元年春夏戎犯延安

我師不利朝廷以堡障衆多有分兵之患其間遠
不足守者即命罷之寇驕而貪益侵吾疆百姓被
其毒君時為大理丞任鄜州從事建言延安東北
二百里有故寬州請因其廢壘而興之以當寇衝
左可致河東之粟右可固延安之勢北可圖銀夏
之舊有是三利朝廷從之以君董役事君膽勇過
人雖俯逼戎落曾不畏憚與兵民暴露數月且戰
且城然處險無泉議不可守鑿地百有五十尺始
至于石工徒拱手曰是不可井矣君曰過石而下

將無泉耶爾攻其石屑而出之凡一畚償爾百金
工復致其力過石數重泉果沛發飲甘而不耗萬
人歡呼曰神乎雖虜兵重圍吾無困渴之患矣用
是復作數井兵民馬牛皆大足自茲西陲堡障患
無泉者悉倣此大蒙利焉既而朝廷署故寬州為
青澗城授君內殿承制知城事復就遷供備庫副
使旌其勞也塞下多屬羗向時漢官不能恩信羗
皆持兩端君乃親入部落中勞問如家人意多所
周給常自解佩帶與其酋豪可語者有得虜中事

來告於我君方與客飲即取坐中金蹠以獎之屬
羗愛服皆願効死青澗東北一舍而遠距無定河
河之北有虜寨虜常濟河為患君屢使屬羗擊之
徃必破走前後取首級數百牛羊萬計未嘗勞士
卒也故功多而費寡建營田二千頃歲取其利募
商賈使通其貨或先貸之本速其流轉歲時聞其
息十倍乃建白凡城中芻糧錢幣暨軍須城守之
具不煩外計一請自給使一子專視士卒之疾謂
其湯餌常戒以笞責期于必瘳士卒無不感泣今

翰林承旨王公堯臣安撫陝西言君治狀上悅降
詔褒之曰邊臣若此朕復何憂二年就兼鄜延路
駐泊兵馬都監制置本路糧草遷洛苑副使慶曆
二年春予按巡環州患屬羗之多而素不為用與
夏戎潛連助為邊患乃召蕃官慕恩與諸族酋長
僅八百人犒于麾下與之衣物繒絨以悅其意又
采忠順者增銀帶馬絃以旌之然後諭以好惡立
約束四俾之遵向然悍猾之性久失其馭非智者
處之慮復為變時青澗既完人可循守乃請于朝

願易君理環朝廷方以青澗倚君又延帥上言人
重其去命予更擇之予謂夏戎日夜誘吾屬羗羗
愛其類益以外向非斯人親之不能革其心朝廷
始如其請君既至環安邊之利害大要在屬羗難
制懼合夏戎為暴發之患又地瘠穀貴屯師為難
聚糧則力屈損兵則勢危斯急病也君乃周行境
內入屬羗聚落撫以恩意如青澗焉有牛家族首
奴訛者屈疆自處未嘗出見官長聞君之聲始來
郊迎君戒曰吾詰朝行勞爾族奴訛曰諾是夕大

雪三尺左右曰此羗兇詐嘗與高使君繼嵩挑戰
又所處險惡冰雪非可前君曰吾方與諸羗樹信
其可失諸遂與士衆緣險而進奴訛初不之信復
會大雪謂君必不來方坦卧帳中君已至蹙而起
之奴訛大驚曰我世居此山漢官無敢至者公了
不疑我耶乃與族衆拜伏誼呼曰今而後惟父所
使自是屬羗咸信於君有兀二族受夏戎偽署君
遣人招之不聽即使慕恩出兵誅之死者半歸者
半盡以其地暨牛羊賞諸有功其僭受偽署如兀

二族者百餘帳咸股慄請命納其所得文券袍帶
由是羗屬無復敢貳君戒諸族各置烽火夏戎時
來抄掠則舉烽相告衆必介馬而待之破賊者數
四涇原帥葛懷敏定川之敗戎馬入縱于渭予領
慶州藩漢兵往扼邠城又召君分援涇原君即時
而赴羗兵從者數千人屬羗為吾用自此始君曰
羗兵既可用矣乃復教土人習弧矢以佐官軍吏
民有請某事辭其事者君咸使之射從其中否而
與奪之坐過失者亦用此得贖吏農工商無不樂

射馬繇是緣邊詩城獨環不求增兵不煩益糧而
武力自振夏戎聞屬羗不可誘土人皆善射烽火
相望無日不備乃不復以環為意前後經畧使交
薦君之才能朝廷益知可倚明年還東染院使克
環慶路兵馬鈐轄仍領環州惟環西南占原州之
疆有明珠滅滅康奴三種居屬羗之大素號疆梗
在原為孽寢及于環撫之狠不我信伐之險不可
入北有二川交通于夏戎朝廷患焉其二川之間
有古細腰城復之可斷其交路又明年予為宣撫

使乃諭君與原守將偕共幹其事君久悉利病即
日起兵會偕于細腰使甲士晝夜築之夏戎固忌
此城君遣人入虜中以計疑之兵遂不至又召明
珠等三族酋長犒撫之俾以禦寇彼既出其不意
又亡外援因而服從君之謀也君處細腰月餘逼
以苦寒城成而疾作以慶曆五年正月七日甲子
啟手足神志不亂享年六十一葬于京兆萬年縣
之神和原君之先河南洛陽人也曾祖存啟河南
壽安令祖仁誦京兆長安令贈太常博士父昭衍

登進士第累贈職方員外郎李父放字明逸初隱
于終南山君少孤依之服勤左右以力學稱明逸
道高德純太宗朝再詔以事親不起真宗復加聘
禮起拜左司諫直昭文館累遷尚書工部侍郎大
中祥符五年君用工部廢得將作監主簿五遷至
太子中舍初監秦州太平監以母老求養又監京
兆府渭橋倉邛州惠民監知涇之保定京兆之武
功涇陽三邑在武功毀淫祠崇夫子廟以來學者
在涇陽有里胥王知謙者姦利事露逃之逼郊禮

乃出君曰送府則會息益以長惡從所坐杖春于
縣庭而請待罪府君李公詔奏釋之自是豪黠莫
不斂手其嫉惡如此又邑有三白渠比年浚疏用
數邑力主者非其才而勞逸弗等功利日削君使
勤墮齊其力故功倍貧富均其流故利廣至今民
能言之歷通判鎮戎軍環鳳二州鳳之守王蒙正
託章憲外姻以私于君復欲以賄汚君君正色不
納蒙正大怒之乃使人諭王知謙訟君蒙正內為
之助獄成流竇州上親政量移汝州君之弟世材

以一官讓君乃除孟州司馬龍圖閣直學士李公
紘雪于朝授衛尉丞主隨州權酤又禮部尚書宋
公綬工部侍郎狄公棐皆言君非辜改知虔州贛
縣君辭得監京兆軍資庫以同鄜交辟改簽署同
州判官事又移鄜州因從軍延安乃有故寬州之
請君少尚氣節昆弟有欲折其家者君推資產與
之惟取李父圖書而已莅官能摘惡庇民青澗與
環人皆畫君之像而享事之及終吏民暨屬巷首
長朝夕臨柩前者數日朝廷深惜之賜三子恩君

娶劉氏封萬年縣君男八人長曰古文雅純篤養
志不仕有叔祖明逸之風次日診試將作監主簿
曰詠同州澄城尉曰諮郊社齋郎曰諤三班奉職
皆有立訢記誼三子尚幼一女適西頭供奉官田
守政君在邊數年聚貨食教孤矢撫養士伍牢籠
羗夷無賢不肖皆稱之又出奇以濟幾事嘗遣諜
者入虜中凡半歲間而虜誅握兵用事者二三人
諜者還言其謀得行會君已沒又天子方懷來故
其績不顯銘曰

嗚呼种君出于賢門吾志必立吾力是陳寧以剛
折果由直伸還自瘡海試于塞垣權以從事意其
出人捍虜之患又邊之民夙夜乃職星霜厥身生
則有涯死宜不泯邊俗祀之子子孫孫

天章閣待制滕君墓誌銘

君諱宗諒字子京大中祥符八年春與予同登進
士第始從之游然未篤知其為人及君歷濰連泰
三州從事在秦日予為監官於郡下見君職事外
孜孜聚書作文章愛賓客又與予同護海堰之役

遇大風至即夕潮上兵民驚逸吏皆蒼惶不能止
君獨神色不變緩談其利害衆意乃定予始知君
必非常之才而心愛焉君去海陵得召試學士院
改大理寺丞知太平州當塗縣移知邵武軍邵武
縣遷殿中丞還臺會禁中災下御史府窮究君與
秘書丞劉越並上疏論災異明非人之所能為朝
廷貸其獄時明肅太后晚年未還政間君又與越
嘗有鯁議暨明肅厭代朝廷擢當時敢言者越既
卒贈右司諫君拜左正言遷左司諫俄以言得罪

換祠部員外郎知信州又監鄱陽郡權酤就九華
山以葬先君既而起通判江寧府丁太夫人憂服
除知湖州賜五品服西戎犯塞邊牧難其人朝廷
進君刑部員外郎直集賢院知涇州就賜金紫及
葛懷敏敗績于定川寇兵大入諸郡震駭君以城
中乏兵呼農民數千皆戎服登城州人始安又以
金繒募敢捷之士晝夜探伺知寇遠近及其形勢
君手操簡檄關白諸郡日二三次諸郡莫不感服
予時為環慶路經畧部署聞懷敏之敗引蕃漢兵

為三道以助涇原之虞時定川事後陰翳僅十日
士皆沮怯君咸用牛酒迎勞霈然霑足士衆莫不
增氣又涇州士兵多沒于定川君悉籍其姓名列
于佛寺哭而祭之復撫其妻孥各從其欲無一失
所者予目此數事乃知君果非常之才始請君自
代朝廷命韓公琦與予充陝西四路馬步軍都部
署經畧安撫招討使復命君守本官充天章閣待
制環慶路經畧安撫招討使兼知慶州君奏言今
既置四路經畧安撫招討使而諸路經畧亦帶招

討之號稱呼無別非統制所宜請去招討二字朝廷以其知體詔從之君去涇之日其戰卒妻孥數百口環其亭館而號送之觀者為之流涕君至慶處置戎事甚得機要邊人咸稱之會御史梁堅奏初君用度不節至本路費庫錢十六萬緡及遣中使檢察乃君受署之始諸部屬卷之長十餘人皆來謁見悉遺勞之其費僅三千緡蓋故事也堅以諸軍月給并而言之誣其數爾予時待罪政府嘗力辯之堅既死臺諫官執堅之說猶以為言朝廷

不得已坐君前守回中日饋遺徃來踰制降一官仍充天章閣待制知魏州又移知岳州君知命樂職度務畢葺遷知蘓州未踰月人歌其能政俄感疾以某年月日薨于郡之黃堂享年五十七天子加贈賻禮進一子官嗚呼予實知君之才而嘗薦之于朝及聞其終泣而誅之惜其才有餘而命不足不得盡其術于生民諸子奉君之喪以某年月日葬于池州青陽縣九華山金龜原而乞銘於予忍復讓哉君河南人也曾祖裔贈將作少監祖嶼

不仕父感雅州軍事推官累贈尚書屯田郎中母
刁氏渤海縣太君追封仙遊縣太君君娶李氏封
同安縣君子四人希仲以方畧進前滑州軍事推
官希魯登進士第希德舉進士希雅尚幼並守將
作監主簿女二人長適池州軍事推官王相次適
進士劉君軻君少孤性至孝居母喪以哀毀屢病
廬墓側踰年手植松柏數萬株生平好學為文長
於奏議尤工律詩積書數千卷以遺子孫中外古
宗族無不盡其歡心其育人之孤急人之難多矣

君政尚寬易孜孜風化在玉山雪上回中岳陽四
郡並建學校紫微王舍人琪翰林張諫議方平太
常尹博士源弟起居舍人洙次為之記重興岳陽
樓刺唐賢今人詩歌于其上予又為之記君樂於
為善士大夫亦樂其善而願書之也可不謂之君
子乎銘曰

嗟嗟子京天植其才精爽高出誠意一開抗職諫
曹辯論弗摧主畧邊方智謀橫來嗟嗟子京為臣
不易名以召毀才以速累江海不還鬼神何意君

昔有言愛彼九華書契以降千戈弗加樹之松楸
蔽于雲霞君今已矣復藏于此魂其依歟神其樂
只壽夭窮通一歸乎至理

試秘書省校書郎知耀州華原縣事張君墓

誌銘

孔子門人七十子之徒天下皆知其賢焉或為邑
宰或為家臣或不願仕蓋顯於諸侯者寡矣然則
七十子之徒孔子語而未嘗及怨何哉君子之道
克乎已加乎人窮與達外也彼戰國豪士不由孔

子之門者則有脫賤貧遂貴高弗奪弗厭滅身覆
宗而不悔何哉不循聖人之道挾數以進求行其
欲得與失重也吾乃知夫由孔子之道者雖困窮
以死不害其為賢矣君諱問字道卿陳留人也天
聖七年秋廣文館開封府所薦士有與主試官親
嫌者別試太常寺予始在秘閣命往尸之得君策
論有漢儒風采乃薦以高等明年不利于春官退
居景陵郡研經講道弦歌終日遠近學者多歸之
既而獻文論百首應茂才異等科第一人召會丁

家難不赴寶元初西羌犯延安君慨然有憂邊之
意述平戎策以進慶曆初故禮部尚書范公雍言
君著萬機濟理書十篇皆國之大議朝廷召試學
士院初命試將作監主簿未調而歸摺紳惜其不
稱時予經畧陝西因表薦之除試秘書省校書郎
知耀州華原縣決滯訟數十吏民服其明屬西陲
積兵民苦於遠輸俗吏急之以奉上官民率多流
亡君獨與民緩期使得措其手足復流亡者千餘
戶陝西都轉運使吳公遵路孫公沔皆以善狀上

聞宣撫副使田公况復稱薦之又本道經畧使鄭
公戢顧京兆屬邑有不治者必遣君治之以慰其
民鄜延路經畧使龐公籍思廣議論之助權署君
幕中仍主州庠以教育人材累表請改官未報會
樞密直學士梁公適來代龐奏君以本官監延州
軍資庫詔從之未幾寢疾以慶曆六年十一月三
日終于延安之官舍享年五十二以某年某月某
日葬于某鄉里曾祖洪隱德不仕祖令釗開封府
太康縣主簿父允河中府觀察推官母夫人宋氏

君娶歐陽氏生一子曰徽登進士第鎮安軍節度
推官知延州甘泉縣二女長適安州安陸縣主簿
朱師德次適進士方琪君力于學志于道直言直
躬自信而不惑有孔子門人之藁而不挾國豪
士之數雖命與道違又何愧哉其子遠來乞銘故
書之曰君子之道耻於弗立立而無所施命也君
子之命患於弗知知而無可柰何天也張君其斯
人之徒歟吾思其孔子之門則當旌其人而不暇
哀其人故昭以銘云

太子中舍致仕上官君墓誌銘

君諱融字仲川其先蜀人也曾祖諱琛不仕祖諱
遜贈禮部侍郎父諱似兵部員外郎京東轉運使
贈光祿少卿妣表氏彭城縣太君君幼專詞學秀
出流輩天皇二年秋廣文館舉進士公卿大夫之
子咸在焉君中第一人明年春禮部較天下之才
君別試于太常寺又首薦之由是名動京師士大
夫願識其面未第間丁光祿憂朝廷錄光祿之後
賜君同學究出身服除授信州貴溪縣主簿君不

辭小官而恪其職今樞密直學士蔣希魯故龍圖閣直學士吳安道時並任江南東路轉運使聯章薦君就遷蔡州平輿縣令吳移使淮南奏掌真州鹽倉又故龍圖閣直學士段希逸與時賢七人舉君于朝旋以疾闡除太子中舍致仕居于曹南郡以慶曆三年三月五日起年四十有九君始娶任氏再娶辛氏封金城縣君子二人長曰延賞郊社齋郎次曰延德君之弟太子中舍隆與其孤以皇祐三年四月六日薨君于濟陰縣沛郡鄉崇儒

里請銘於予予天禧初為譙之從事光祿公方典是郡君時侍行而予始識君見君文雅有議論不敢以子弟器之後數年與君會于京師與之遊皆當世異才以文學風義相許予益愛焉君既祿仕而大夫之賢者多薦之斯可謂之聞人矣惜乎命之不修弗克樹勲於時可永歎焉或者曰儒生多薄命天豈不與善也余謂不然君子之為善也必享其吉有窮且大者世皆重而傷之雖一二人猶以為多焉小人之為不善也必懼其凶其禍且死

者世皆忽而忘之雖千百人若無焉如仲川之亡
可謂重而傷之者矣故作銘云
惟人之才而無命兮猶物之秀而不實品彙紛其
自然兮非化工之能一仲川之亡兮可柰何如川
之去兮無還波彭殤至此兮孰少孰多君子之思
兮徒為乎悲歌

太子中舍致仕范府君墓誌銘

府君諱仲溫字伯玉四代祖諱某幽州人也唐末
為處州麗水縣丞中原亂離遂家于蘇臺曾祖諱


其事錢氏為中吳軍節度判官贈太保祖諱某以
神童補官終于祕書監贈太傅考諱某歸皇朝歷
真定府武信軍掌書記贈太師兼中書令府君即
太師仲子也生于京師幼孤還蘇臺與諸從兄弟
居服勤素業孝悌于門中景祐二年以某遇乾元
節恩例補試將作監主簿赴調除越州新昌尉以
試接物民用知勸在邑三年盜不及境外計舉監
杭州餘杭縣市征能寬其利商旅便之三載以績
聞按察使洎牧守咸有表薦除寧海軍節度推官

知台州黃巖縣慶曆七年海潮大至壞州城人皆
逃散沒溺者甚衆府君教民為椽蓋夜救之全活
數千人既而上官知其所存請董衆以治城府君
雅喜利人長於慮事衆議築土為城用甃以傳之
府君獨不然謂人築且勞又捍水之衝甃何能久
乃集民累土以牛數百蹂之堅而後增至于城復
表以長石互相銜枕勢莫得動其城入門皆設之
閘遇水暴至則障之衆伏其善台人遂安時又歲
饑州命邑官率富人出穀俾輕其價以助窮民而

窮民之資無以得穀府君諭之曰汝糴之十不若
與之二三則富人易辨而貧人易及衆皆悅從饑
者獲濟焉永嘉郡禁盜十四人獄具皆當極法外
臺請府君慮問府君原盜之情而重其行法固請
覆奏朝廷悉恕其死黃巖大邑民數萬戶訟爭盈
庭府君專尚仁愛多以理遣至有犯徒刑而情非
巨蠹者府君必為解其仇訟而決平之民自愛服
制置按察等使交章薦之府君秩滿還家與鄉舊
游曰吾樂矣何用官為遂請老朝廷嘉之遷太子

中舍致仕皇祐初其來守錢塘與府君議置上田
十頃於里中以歲給宗族雖至貧者不復有寒餒
之憂府君退居四年賓親盈門以東臯所入日為
鷄黍之具故貧而常樂顧鄰里鄉黨有急難則竭
力以濟之皇祐二年九月十三日以疾不起享年
六十有六中外宗親莫不過哀里人無老少皆涕
下其遺愛感人如是之深娶丁氏夫人男五人長
曰純義守將作監主簿四子尚幼女四人長適進
士李公次適進士沈充二女在室以其年十一月

十三日葬于吳縣天平山三讓原嗟夫某從事四
方與府君別動逾千里及餘抗得請一獲其願相
會未幾而有死生之訣泣血灑毫不能成文銘曰
嗚呼先公五子其三早亡惟兄與我為家棟梁兄
又逝焉我獨徨徨諸稚在前未知否臧我其教之
俾從義方積善不誣厥後其昌



宋文正范先生文集卷之九

